


THE CHURCH BULLETIN

Millennium Special Adok Jan. 2001



Kohima Ao Baptist Church

EDITORIAL

A. Chuba. Jamir.

Tsüngremer kümsük 2000 A.D. tatempang aser putu tasen 21st noklangzüng 3rd millennium tenzükbä mapang ka asenoki ngutettsü Tsüngremi arishi agütsü nung pa tenüng sangdi. Taoba kümtem nung iba putu tatem ya koma ka asütsü ta ratamata liasü. Alima nung osang balala ajanga sangdongba ngua asenok temulungjang nung terataba aser teyongyaba aika liasü südi ta amanger. Tanü iba anogo asenok nem tonga bener arutsüogo. Anungji asen temulung tanela ajak agi pa asangtsü tim lir.

Meimchir otsü nung angur, putu balala nung Tsüngremi temeim agi parnok alar tia nungi nüchi kümdaktsütsü asoshi sendong yimya balala ajanga jungkai adoka jembi. Putu ka nungi ka süia oaka ainkartem ajanga Tsüngremi iba sendong tanen makai meimchertem dang sayu. Parnok kümzütsü asoshi lemantem sayua, meima, aser anepalua aru. Putu ka nungi kati parnok ania aru. T. Kunem 34:1-5

Israel alar tia nungi anitetsü Mosa nem mapa tulu Tsüngremi nungloktsü. Aser pa lineba nung Tsüngrem tashi dena Mosai par nubor anitet. Pa ya Tsüngremer mouthpieceji liasü. Kinü mapang nungi nubojung tashi Mosa Chuba kidang liasü. Alima yimten-yimsüsüba-ren aser nubor tia ajak meteta chuba kidang lir, küm lir asüadang pa chuba kidang nungi pilaa oa bendang lima ka (Exo.2) Midian nung ali. Teko Jethro-er kidang san-anükba mapa yaritepa mapang talangka lir külen, kunü kodang pa Horeb tenemi aru, süngsemrong nungi milak adoka Tsüngremi pa den jembi. Iba tenem nung ola adoka Tsüngremi pa den jembibaji par nubor alar tia nung aliba nungi anitettsü mapa nungloktsüba liasü. Aser kin ka anitettsü Mosa idangyongjisa Tsüngremi nongloktsü. Aser pa ket nung bena aliba ajok ajanga sayatenya mapa inyaktsü, aser iba ajok tashi nung par nobur anitsü mela.

Tsüngremer anogo 40 agi küm 40 kuma Israel nobortem jajatsüsa aküm. Tsüngremi Abraham dang nungzükbä lima kong ninang mojitsü agi sunga liasü. Egypt alar tia nungi apusoba nubortem rongnung Joshua aser Caleb dak alaka tanüngba nubor shingaia canaan lima metongtet, ta otsüi ashir. Lemang nung jajadang nubortem asatapa aser nemnemba tulu liasü. Iba yongji Mosaa tai menatsüsa aküm. Timtem aser rara aika ajanger kulen, joko tenangzükbä lima oji ta nungi penzütsüsa tesem nung lia, Tsüngremi Mosa Nebo tenemi anir atu. Aser iba tenem nungi Tsüngremi tenangzükbä lima sayu. Aser Mosai canaan lima menungraa penzü. Iba tenem nung Mosai kanga menungra aser ngunua aliba limaji repranger, Kibuba o amato Moab lima nung Mosa asü.

Iba Nebo tenem nung, Israel lima, tanü alima balala nungi tamangertem sentepa sendong tulu akaba asenoki angashir. Anogo tepiyong sendong tajung kar kulen, nikongtsütsü anü talui tebilemtetba sendong ka kaa liasü. Küm merijang aika tejaklen koba tenzüker Mosai tenangzükbä lima penzü, yamaji tamangertemi tanü iba tenem nungi Khrista aruba aser kotak lima penzüa, 'NU YIMLI ARUNG' ta alima dang tayimoktsüba osang sangdong Aser iba tenem dang GATE WAY TO MILLENNIUM' ta jaa Tsüngrem yimli onok dangi arung ta agizükba sendong aka. Iba 20 buba putu tempanger aser putu tasen millennium tasen ka asenoki ajurutsü yongyaa atartem. Tsüngremer kümtem anogotem ka ken ka ken ta melentepa arudang iba ama mapang ka nung asenok lidaktsübayong pa nem tenüngsang agütsüba den kulemi Millennium taseni ayaoka aidang Mosai tenangzükbä lima menungra penzüba ama Khrista yimli arung ta taküm shia terenemba nung jajadi ta ayongzüker. Tsüngremi iba bulletin azünger ajak moajangma. 'AMEN'



KOHIMA AO BAPTIST AROGO TAKÜM NUNG AJANGSHIA ARUBATEM

Tsüngremer sendong atalokdakaja Kohima nung arua sorkar mapa inyaker kibong 10-i longjemer 1939 küm Kohima Ao Baptist arogo tenzük. Alima aser nobur temelenshi ajanga nutsüng teimba sendena iba arogo terenlok jenti lia aru. Mezüngbo deobar anogo dang sentep agia liasü, lia lia, arudang nungdak ta ajitet 1970 küm Bothar aonung sentep tenzük. Aser ano 1972 nung Honibar aonung sentep tenzüka ao.

Naga lima nung kodang Revival milak jangro tongtipangsa Aolima nung, iba revival agi kanga semdang, iba sulen 1977 küm hombar aonung sarasadem sentep tenzüka, tanü tashi ibai first Monday of the month sector nung sarasadem agia arudagi. Iba

den kulemi sector balala nung sarasadem tesepe (prayer cell) tenteta agia aruba temoatsü jenti lir.

Arogo nung nutsüng tiemba akümba den ano Khristar mapa tali tabensa nung inyaka aotsü nükjidong nung, department balala mapa lemsaa inyaksü tenzüka ao.

Arogo nung tanurtem asoshi Tsüngrem O angazükdak Sunday school ya kanga tongtipang lir. 1950 küm tanur terok ayongtena mezüngbuba Sunday school tenzük, Küm 50 abensadang joko tang sector 9 nung tanur ajak agi 2567 lir. Iba den ano 1972 küm Child Evangelism fellowship tenzüka tanü tashi iba ministry ajanga tila tanurtem aika temoatsü ngua arudagi. Tang tashi nung joko CEF nung tanurtem ajak agi 739 lir.

Khristai arogo aser kija shia nem nungloktsüba tenyaba mapa inyaksü, atema 'KABA MISSION' 1977 küm tenzük. Aser akok tashi tesem balala nung teyari agüja inyaker. Iba den arogoi South Bank Baptist Mission pabhala Jorhat nung Field Director ka kubok Missionary teachers aser evangelistem yua tenyaba mapa inyaker.

Osangtajung sayutsüngiba mapa inyaksü arogo nung 1963 küm Evangelistic committee tenzüka, maneni iba committee ajanga arogo nung aser atena oa tesem balala nung sayutsüngiba mapa inyaker.

Tamangertem asoshi Yisui ashiba ama sarasadem ajanga alitsü, Arogo nung mapang shia Chain of prayer aser fasting agitsü sarasadem committee ka 1978 küm tenzük. Iba committee-i kibongtem dangi yia sarasadem den küm tsüngta prayer & fasting sendongtem agia arudagi.

Tetsür sentep 1952 küm tenzuka, tetsütemi kibongtem aser lanurtem asoshi maneni khuret bena sendong tajung yanglur mapa tajung jenti, arogo nüm tayari tulu agüja arudagi. Associate Pastor (Women) ka kübok maparen ajak takok ngua inyaker

Mrs. Temsüla. Arogotsür secretary (B.Th) Changki arogo nungi 1995 küm nungi tenzuka secretary mapa inyaka arudagi. Tangatetba tulu nung maparen ajak nung arogotsur mapa nungeta yaria arur. La tenzükba mapa nung Tsungremi moajangma.

Lanurtem tanula nung mesütsü nükla nung youth fellowship 1952 küm tenzük. Iba mapang lanurtem ishika dang liasü, saka tang reprangdangra, Tenzüker ana, Youth Director aser Asstt. Youth Director kübok lanurtem züngsem 2200 tashi küma renloka aor. Arogo nung lanurtem shilem tajung agia arudagi.

Arogo tenzuka lia arudang tamangertem kulemtsü mezüng tenla ki ka 1950 nung yanglua meshitet. Aser ibai mezüngbuba tenla ki tasen ka yanglua meshitetbaji liasü Nutsüng tiemba akümba ajanga lia arudang ano tenla ki tuluba 1963 küm yanglushia meshitet. 1970 küm tajungba ka yanglua liasü Aser 1983 küm tang aliba tenla ki ya yanglua tanü tashi tekülem yangi agia arudagi.

Arogo nung maneni nutsüng züina aoba den ano Tenela mesüba tali tajungba inyaktetsü asoshi sector 6 (terok) tashi nung fellowship tenzük, aser sector shia nung 1992 küm nungi Associate Pastor kaka yua sannükba mapa inyaka arur. Sector terok, tenüng, 1. Bayavü. 2. Merhulietsa, 3. Ministers Hill. 4. Lerei 5. A.G. 6, Chandmari. Sector ajak nung arogoi tenla ki yanglua lir. Mezüngbuba fellowship tenla ki A.G. nung 1986 küm yanglu, aser yamaji mapang balala nung nung sector ajak nung tenla ki yanglua aru, tatempangsa tang Ministers Hill fellowship tenla ki teyangludak lir.

Arogo tenzüker joko küm 61 tain lia arudang iba Arogo Tsüngremer temoatsü jenti agi aniba tepela Tsüngrem nem agütsüdi. Mezüng arogo tenzükdang kibong 10 liasü, tanübo kibong ajak agi 2107 aser nutsüng ajak agi 9443 küma renlokogo, Pastor incharge ka küpok lia aru, tanü sector terok nung Associate Pastor kaka, Pastor ka, tetsür Pastor ka, Youth Director ana, tila tanurtem Director ka ta ajak agi tenzüker 11 lir. Iba den Arogo secretary ka Acctt-cum-cashier ka, Chowkidar asem aser Driver ana ajak agi 7 lir. Alima putu melenshia aser ina aoba den iba arogo Tsüngremer taochi ajanga terenlok jenti lia aniba den Tsüngremer kümsuk 2000 AD. Tembanga putu 21 buba aser 3rd Millennium tenzükba mapang tatentep nung lidaktsüba asoshi Tsüngrem nem tenüngsang agütsür, Aser pa temeim taochi nung arogo aniba osang tatsü agi agütsür. Tsüngremi iba osang azünger ajak moajangma. 'Amen'

AROGO NUNG TENZÜKERTEM



*Rev. & Mrs. T. Supong
Pastor. KABA*

Tamalen Arogo ana tashi nung sannükba mapa inyaka arur, Kohima Ao arogoi asüngdangba ama 1972 Küm nungi tanü tashi Pastor ka ama bandanga agüja tenzüka arudagi. Pa Kohima Ao Baptist arogo nung mezüngbuba full time Pastor lir. Pa mapang nung arogo anir arur. Kibong khuret den arogo mapa jenti inyaka arudang timtem aser tebilemtsü aika ajuruaka aremzüka Tsüngremer lineba nung anir aruba ngua kanga pelar. Pa ama taküm nung tajangshi aika bener, taküm piyong Tsüngrem tenzüka tanu tashi ani belem mesasai bendanga tenzüka mapa nung nokdaka aliba ya lanurtem asoshi tangazüktsü aser arogopur asoshi aküm ka lir. Tsüngremi maneni par moajang ta sarasademer. Par kibong nem jabaso 5 aser jala ka moaja lir. Maneni putu tasen nung tali tangatetba tajung agi Kibubar tenzüksü pa aser temeim kinungtsü Mrs. Tamongla arishia moajang ta ajaki sarasadem agi yaritsü mepisher.



Rev. & Mrs. I. Yapang. Walling
Associate Pastor, Chandmari

Tenzüker Rev. Yapang (M. Th) Maharastra tribal mission, Lonvala station sür küm 8 (ti) tashi missionary mapa inyaka liasü. Pa ministry ajanga tanula jenti ajangzüka inyaker kulen pei limai meyipa arua, Iba arogo nung 1996 küm nungi tenzüka arogo nung Associate Pastor mapa inyaka arudagi. Pa ama “field experience” akaba tenzüker ka arogo nung aliba tajangzük tulu lir. Pa kinungtsü Mrs. Atula, tenzükbä maparen ajak nung teyari agüja aruba ngua pelar. Par kibong nem Tsüngremi jala ana aser jabaso ka moaja lir. Maneni Tsüngremi Pa tenzüksü adianu kibong moajangma.





Mr. & Mrs. I. Bendangmeren
Associate Pastor Minister's Hill


Arogo nung Home Evangelist mapa 1986 küm nungi tenzüka inyaka arur, 1992 küm nungi arogo mapalem telemtetba ama Associate Pastor ka ama Ministers Hill nung inyaka arudagi. Pa dang masü Kinungtsü Mrs. Yashila Jamir. Arogo nung Associate Pastor (Women) 1983 küm nungi Arogotsür mapa nung tenzüka arudagi. La ajanga tetsürtem telok nung tanula tangatetba nung tejakleni aoba angur. Kibong nung kinungtsü aser kinungbo anapronla kulemi longjemer Kibubar mapa nung bendanga tenzüka arudagi Kibong rangpeni Tsüngrem tenzükbaya jentipur asoshi temoatsü lir. Par kibong nem Tsüngremi jala ana aser jabaso ka moaja lir. Tali bendanga putu tasen den tejangraba agi tenzüksü Tsüngremi par kibong moajangma.





Mr. & Mrs. M. Asangba LKR
Associate Pastor, Bayavü

Tenzüker M. Asangba Lkr. Missionary ka ama phom kin nung küm 5 (Pungu) tashi tenyaba mapa inyaker, ano Tsüngrem o tali bushitsü tzüyim atena oa küm aika lir, tangazükba tulu den meyipba arua lia, Kohima Arogo nungi tajaba ngua, 1991 küm nungi tenzüka lanurtem den küm ka inyaker, 1992 küm nungi Associate Pastor mapa inyaka arudagi, Pa kinungtsü Mrs. Narola School nung tesayur mapa inyaker, aser lai mapang ajak nung angateta kinungbo tenzüka mapa nung yaria arudagi. Kibong nung yamaji tangatetba telongjem nung Tsüngrem tenzüker kibong maneni moajangma. Tsüngremi jala ana aser jabaso ka ta moaja lir.



BAYAVÜ TENLA KI



Rev. & Mrs. T. Chuba, Jamir
Associate Pastor Lerie

Study temer lia, Kohima
Ao Arogoi asüngdangba ama
arogo secretary mapa inyaksü
1987 küm join asü. Iba mapa
nung küm pungu arogo temulung
jia inyaker külen, ano tenzükba
tali sadema inyaksü
nungloktsüba ama 1992 küm
nungi Associate Pastor mapa
inyaka arudagi. Lerie fellowship
nung inyaka lia ano tenzükba
mapa nung tali bendanga
inyaksü ABAM ajanga 5th Nov.
2000 nung ordianed süogo.
Kinungtsü Mrs. Ajungla, lai
kinungbo mapa nung teyari agüja
tenzükba mapa nung shilem agia
arur. Par kibong bendanga agüja
tenzükba nung Tsüngremi ano
tarutsü putu tasen nung tali
tuluba inyaksü amshiangma.



LERIE TENLA KI



Mr. & Mrs. Sentisashi, Aier
Associate Pastor A.G.

Tsüngrem O züngzüklidang, Tsüngremer tajaba anga Kohima Ao Baptist arogo nung arua Associate Pastor asangur ka ama join süa inyaka aru. Mapang tatsüka tsüngta pa nem tetemjen kinungtsü ka moaja kibong aküm. Wadang tuluba aser tangatetba nung tenzüktettsü asoshi tazüangi oa M.Th renemer arua AG nung Associate Pastor mapa takok ngua inyaka arur. Par kibong nem Tsüngremi Jala ana moaja lir. Kinungtsü Mrs. Anungla. Pongen Science college nung tesayur mapa inyaker. La mazüangi liaka tangatetba tulu agi kinungbo den longjema tenzükbba mapa nung nungeta yaria aruba ngua pelar. Tsüngremi Pa tenzüksü maneni par kibong moajangma.





Mr. & Mrs. A. Chuba. Jamir
Associate Pastor, Merhulietsa

Tsüngrem tenzüksü koba arogo nung suder süaka, lanurtem den inyaksü jangraa sarasadema lia, Kohima Ao arogo nungi tajaba arua, lanurtem den inyaksu 1992 küm join asü. Küm pungu iba mapa nung tangazükba tulu lia inyaka arur, kulen ano arogoi asüngdangba ama Associate Pastor mapa 1997 küm nungi tenzüka Merhulietsa sector nung inyaka arudagi. Mapai aitdang asangur ka ama ait, tang kibong kümer Tsüngremi par nem jabaso ana moatsü. Kinungtsü Mrs. Sentila, tenzüka mapa nung kinungbo akok tashi nungetba ajanga kibongi jangratema tenzüka arudagi. Tali bendanga anagteta pa tenzüksü Tsüngremi par kibong moajangma.





Mrs. Alice Walling
Director, Christian Education

Science college fellowship nung küm 10 (ter) tenzüka, arur, Arogoi nubo asüngdangba ama la aser kibongi tajaba angateta 2000 AD küm nungi Kohima Ao arogo nung Director, Christian Education ama inyakdagi. La ama tazüngba peria akaba tenzüker ka nguteta arogo nung aliba ajanga tarutsü department maparen nung temelenshia adoka inyaka aotsü imlar. La kinungbo Dr. Wati Science college nung tesayur mapa inyaker. Pai tangatetba tulu nung kulemi tenzüka nung teka amteper inyaksü mulunga lir. Par kibong nem jala ana aser jabaso ka ta moaja lir.



Mr & Mrs. I Chubameren
Secretary KABA

Govt. Mapa nungi sodi agir lia, arogo ajanga asüngdangba ama Tsüngremi mulungba mapang tashi ka arogo nung secretary ka ama tenzüksü agizük. 1999 küm nungi tenzüka arogo secretary mapa inyaka arur. Pa ama mapa nung tenendak tenzüker ka ngutetba asoshi pelar. Par kibong nem Tsüngremi jala ana moaja lir. Pa kinungtsü Mrs. Rendikümla, kinungbo tenzüka mapa nung sarasadem agi nungeta yaridagi. Par kibong tenzüka nung Tsüngremi moajangma.




Mr & Mrs. Moa Longchar
Acctt cum-cashier

Mr. Moa Longchar college nung azüngba mapang nungi Kohima nung lanurtem activities ajak nung shilem tajung agia liasü. Arogoi Acctt-cum cashier mapa inyaktsü asüngdang, aser pai mulungsoa agizüka 1991 küm mapai ait. Iba küm nungi tanü tashi arogoi nungloktsüba mapa kanga tang nendaka inyaka arudagi. Arogo tulu mapa jenti asünung sodi kunü danga magi-i pai mapa nendaka inyaker. Pa kinungtsü Mrs. Ajongla supervisor social welfare department nung inyaker. Par kibong nem Tsüngremi jala ana moaja, lir.




Mr. Tiatoshi, Longkümer
Asstt. Youth Director

Pastor kibong ka nungi, Tsüngremi ajaba angashia Tsüngrem o azüngba renemer lia, Kohima Ao arogoi asüngdangba ama tenzüksü pelaa agizük. Aser 2000 küm pa lanurtem den Asstt. Youth Director mapa inyaktsü agizükba ama tejangraba tulu nung inyaka arudagi. Pa ama asangur Tsüngrem tenzüker kibong ka nungi arogo nung tenzüksü ngutetba asoshi pelar, Aser pa ajanga lanurtem mapa nung ano tali tajungba inyaka aotsu imlaa atar. Tsüngremi pa mapa asoshi pa taküm tali amshiangma.



Mr. & Mrs. Toshi Langu
Youth Director.

Lanurtem den tenzüksü jangraba aser sempet akaba tenzüker Mr. Toshi Langu, Govt. School nung tesayur mapa inyaka lia Tsüngremer tajaba angateta inyaka aliba mapa toktsür, Arogo nung Youth Director mapa 1997 küm agizüka inyaka arur. Iba ama tenzükeri tenla tulu Khrista aser arogopur asoshi inyakba kuli ajanga, lanur jenti pa ajanga temoatsü ngudagi. Pa kinungtsü Mrs. Bendangla. College of Education nung tesayur mapa inyaker. Lai kinungbo tenzüka mapa nung nungeta yarier. Tsüngremi par nem jabaso ana moaja lir. Putu tasen nung lanurtem ano tali tejakleni anitsü Tsüngremi pa tenzüker amshiangma.



Mr. Sakusangba, Mr. Tinuangnen
Mr. Ajoy, Mr. Bahadur, Mr. Kampong.

Arogoi nungloksüba mapa chowkidar aser drivertemi akok tashi meranga inyaker. Tenüngja balala dang saka ajak kulem Tsüngrem tenzüker ta tangatetba nung parnok ajaki bendanga agüja timtem arema maparen ajak inyakdagi. Parnok tenzüka mapa asoshi pelar aser maneni Tsüngremi moajangma.



Pastors & Deacontem

Arogo nung tang teinyakdak Pastor aser Deacontem. Iba arogo maparen ajak board telemtetba ajanga inyaker. Tongtipangsa Deacontem Govt. Mapa tulu nung mazüngi alirtem dang, saka arogo mapa ajak nung shisatsü, mapang tajungtiba tenla tulu agüja inyaka aruba pelaba shisemer. Parnok kibongtem maneni Tsüngremi moajangma. Aser putu tasen nung nükla tulu yur ano maneni Arogo tejakleni anitsü mangdang agüjang ta ajaki sarasademtsüdi.



Pastortem

Alima nung Tsüngremer temeshi mapa inyaksü ajaba tenzükertem, arogo nung santem mesüba aser anükba mapa nung akok tashi inyaka arudagi. Maneni Tsüngremer taochi nung pa mapa kutdangsüba tali tajungba nung aser nendaka inyaksü Tsüngremi item sannükertem taküm aser kibong moajang ta sarasademtsütsü mepisher.



Editorial Board

Arogo bulletin editorial board member asem lir. Arogo nung inyaka aruba ita asem nung ken iba bulletin nung adoker. Arogo nung department balala inyakba aser Tsüngremi koda len ani aru iba indang tatsü den lai bushiba aser alima nung tatalokba osangtem kar dena iba bulletin nung adoktsür.

Board member nung Pastor ka aser lokti nungi member ana Mr. R. Wati Imchen aser Mr. R. Toshi Tzüdir ta lir. Denaprongla Govt. Mapa inyaker saka arogoi nungloktsüba mapa tanü tashi kanga meranga inyaka arur. Aser amanger arogo bulletin ajanga nobur tajangzük ngua alitsü. Nubortem asoshi mapang tenla agüja yaritetba asoshi pelar. Parnok kibongtem asoshi maneni Tsüngremi moajang ta sarasademtsüdi.

KOHIMA AO BAPTIST AROGO TAOBA INDANG TENÜNGSANG ASER TARUTSÜ TAYONGZÜKBA

Kütem süitema oadoker, Putu ka arur aser yimsüsüba menden melener. Nisunger sobaliba aser yimsoshiba melenshia akümer. Alima tashitemetet tali tali renloker, Rongsen teimba züsenteter, kodanga matalokdangba aser mangashidangi aliba tsüngmangtsü mapatem alima nung ataloker. Aji saka Nisüngi teyanglur Tsüngrem sendongji meshisadanger aser taküm indang süoki yia mebilemi pei sünütsü süa alir. Aji agi taküm ka samabaji kecha Au! ta meli-i züba zübaa toktsür. Saka Tsüngrem temeimi alima tonga alua kotaker milen sangwaji menenpur dak yaloktsü aser tekümtet sendongji alima nung tenzük.

Yisu alimai arur küm 2000 abensaba tatembangba anogo tashi asenok kümüzka anir aruba atema pa tenüng asangtsü tetemsü lir. Aikati putu tasenba den ajuruteptsü yongyaseta ataa alidang meimlai lia taküm lisü rakdanga bener or ali nung mejanga lir. Joko kodanga meyipa meshilangtsüba limai parnok oadokogo. Saka adianu, na aser nibo arishi agüja Tsüngremi wazüka yuja alinung Pa nem asenoki tulutiba aser tajungtiba tenüngsang agütsütsü tenungdaksü.

‘Halliluiyah’ ta asenoki ayimtena Kibuba tenüngsanga pelatepa iba putu tasenbai aitsü asen mulungjang pa nem talidak agütsüdi. Kechiaser tanü anogo ya osangtajung anogo lir. Asenok ajemajema ola madoki alitsü ya mapang masü. Tsüngrem yimli koba tatem maka yimsüsütsü arutsübalir, iba yimli nungji atentsü asoshi, asenoki sotaka aliba temenen toktsür, tamang tetenzük aser tabensadaksüba Yisu shibai Kangki timtem aremzüka Tsüngrem Chuba menden tachichilen amen, Pa dak repranga asenok jakdang aliba tasemtepba nung taremzük agi asemtepdi. Ibri. 12:1-3. Anungji kodanga memelenshiba Yisu Khrista dak rangloker, paji ajak nung teyongtsü kumdaksür tamang temelenshiba agi Putu tasen nung KHRISTA DEN NUKLA TASEN NUNG jaja-a tejakleni asemtepdi. Kechiaser asen Kibuba Yisu den ajuruteptsü mapang tatsüka dang ta meteta na renema alitsü tanü arogopur ajak ayongzüker.

Nenok rongnung Sannükba mapa nung,
Rev. T. Subong Pastor.



PUTU 21 BUBU MEZÜNG NUNGJANGSANGWA (DAWN OF THE CENTURY)

By - Rev. T. Chuba
Associate Pastor
KABA

Tanep nungjang sangwa aluba den asenok dangi putu 21 buba aser 3 buba Millennium mezüng anogo arugo. Teti adokba anü dang adoker, saka tanep adokba anü jagi asenok nem mapang ana kulemi bentsür arugo, Tang asenok putu tasen aser Millennium tasenba nung ajemokogo. Iba ama mapang aser putu melentepba mapang ka nung asenok atashiba asoshi Tsüngrem tenüng sangdi. Saka ya mamali tanü nungi tenzüka aoba putu ya tatembangleni asemer ta meteta teti sakasalema lidi.

Meimchir otzü nung Tsüngremer kümsükji Adam nungi tenzüker. Adam nungi tenzüka Yisu Khrista Betlehem nung asoba mapang tashi nung küm 4000 (Four Millennium) süiogo.

Yisu Khrista sor külen tang tashi nung küm 2000 yasüng tashi nung süiogo (Two Millennium) Iba Meyi 2 putu dang Arogo putu ta-a ajar. Iba putu nung Tsüngremi Arogo nem Pa atema Osangtajung sayutsü temelaba tashi agütsü, Aser alima ajunga nung Pa osang prokshiogo.

Tang asenok Kibuba Khrista küm Meyi 3 buba (Third Mellinnium) nung noktaka lir. Iba den tanü anogo nungi 21st. Century tenzüker tanü nungi tenzüka azüngba anogo, küm, aser putu kwi buba nung Khrista arutsü asenoki memetet. Kechiaser nisungi küm nungi küm ta mapang azünger, Saka Tsüngremi Tatem maka mapang nungi azünger (People seestime against time; but God seestime against eternity). Saka alimaji tatembang leni ilunger ta alijak nung tatalokba mapa aser ataloktsü aliba yimyatem ajanga metetdi.

Osang kaket ka (New York Times) 18/12/2000 nung ashiba agi tanü nungi tenzüker 2015 küm tashi nung danga alima nung tatalokba aser temelenshi tulu alitsü ta ashir.

(1) Alima rangben nung tzü agi anungba wara tulu arutsü, Anü tali aputsü alima kanga tatsükba akümtsü, Tsünusempongtsü aser taküm shiruru aser meimchir talitsü tasak akümtsü.

(2) Alima ajunga nung aliba nütsüng yongzük tesadangka dak tali (Billion 3 dak tali) tzü agi anungba timtem agi atongtsü.

(3) Tang nungi 2015 küm tsüngda nungji Middle East nung Palestinian State ka yangerteter atatsü, Aser parnok yimtittem shia nung tang aliba par nütsüng dang nungi Millon ter-i tali renloker atatsü. Saka yangi tebilemtsü kaji Palestinian State yanglutetdangji kechi leman agi yanglutsü aji shisabulutsü ka lir. Ibai lendong tulu adoker-ang yanglutsü akok.

- (4) Ano Middle East lima ajunga nung 2015 tashi nungjibo nisung tali renlokba tebilemtsü tulu alitsü ta ashir. (Population pressures) Tang ya-a sunga Middle Eastern countries nung nütsüng yongsük tesadang ka dak tali tasoba küm 20 nungi shir teküpok dang ta ashir. Anungji küm ishika tsüngda nung item lanurtem nungi nisung jenti arentsü, Aser itemji ken mapang kabo tongpang nung nokdakertem akümtsü.
- (5) 2015 küm tashi nung Russia limaji rongsen, Sepai aser loktiliba (Economically, Militarily and Socially) ren tali tali tashi maitba akümtsü ta alima tia asadangertemi ashir.
- (6) China lima nung yimten, Rongsen aser loktiliba (Political, Economic, Social pressures) ren tebilemtsü aser timtem tulu adoktsü. Aser tang aliba communist tashi-ji anokshitsü.
- (7) China, India aser Russia kin longjemer US aser Anüolen lima aliba kintem tashi den kesa tashi alitsü merangteptsü ta ashir.
- (8) Russia nütsügyongsük tang 146 Million alibaji küm 15 tsüngda nung tajemba küma 130 million dang akümtsü ta ashir. Ibai par lima nung rongsen lemang nung tashi maitba akümba ajanga adoktsüba lendong ta ashir.
- (9) India-i “Nuclear capable force” tuluba akümtsü aser Pakistan-ia “Nuclear and Missile force” timba yanglutettsü ta ashir.
- (10) Alima ajunga nung lendong atoktsüba temelatiba country temji Iran, Nigeria aser Isreal ta ashir. Item lima nung tang nungi tenzüker 2015 küm tsüngda nung Tamangba yimsü & kin kidong lipok otsü bushia tambu raktepba agi mangatetep aser telemsa tulu parnok lima nung adoktsü ta ashir. (Religious and Ethnic divisions)

Item ajak yagi tarutsü anogotemji kanga tamang nung lir ta sayur, Aser asen Kibuba Yisu Khrista yakta arur ta sangoktsür kechiaser Tsüngrem O nungji yamai ashir küm meyi kaji anogo ka ama lir, iba o ya nenoki tama. Kari menur ama bilemer, Kibuba pei tenangzükba indang memenur; saka shinga mesamadaktsünur, saka ajak temulung meyipba dangi arutetdaksünüa nenok tsütsü pai talangka aremzüker.” (2peter 3:8,9).

Tsüngremi iba onük azünger ajak moajangma.



*New Millennium Spicial Bulletin azünger ajak
dang Arogo-i tepela Putu tasen den küm
tasen salem metetdaksür.*

EDITORIAL BOARD

Mr. A. Chuba Jamir Editor
Mr. R. Toshi Tzüdir
Mr. R. Wati Imchen

Copies 2000

Printed at : N. V. Press, Pezielletsie, H.S.Road
Kohima - 797001, NAGALAND.